

Mbouj Rox Mbawraeunding Gyaeu Gvaq Va

Youq ndaw ndoenggoraeu daenggoenz ciuq de, gou ciengq go dwk, laep da hwnj, dingq sing din caij mbawraeu fat ok haenx. “Ca ca ca……” lumj fwn seizcin yaengyaeng doek roengzdaeuj, lumj nonsei gwn mbawsangh, lumj raemx lae gwnz rin, dingq gij sing baenz-neix ndeidingq, saedcaih dwg cungj yiengjsouh ndeu ha! Raq rumzcou liengzsi ndeu ci gvaq, mbawraeu geq mbouj sat de bibi buengqbuengq, yiengjcaca, lumj damzciengq diuzgo haenx seiz-cou, youh lumj bekwngz angq-coux gou nei.

Yawj, baenz go baenz go raeunding, geijlai lumj feizmbaw dawzyubyub, youh geijlai lumj

fwjhaemh gyaundeidei gwnzmbwn doek roengz gizneix. Gyoengqde nding dwk daegbied rongh, daegbied lwenqda, vaq baenz raq heiq raeujrub he, itcig lae haeuj ndawsim gou. Cingq youq gou siengj ndaej haeujmaez, mbaw raeu daegbied gyaqciq he biek nyeqfaex de douh haemq nanz de, daj gyangmbwn mbin-fengfeng doek roengzdaeuj, geij-lai lumj duzmbungqmbaj nding cingq mbaeumbeng mbinfoux ha! Gou angqvau siengj dwk: Mbawraeu lumj hotsei lumj mbawveh, de daihgaiq dwg dahsau seizcou sij saengqyo-mbaiq hawj daxmeh daihdeih ba!

Mwh gou cingq siengjgyae, youh miz mbaw raeu ndingyanz

he doek youq henz din gou. De beij mbaw haxbaenh hung di, lumj fajfwngz nei, moix “lwgfwnz” cungj dwg soemsusu, youh lumj diuzrieng byagim nei. Sijsaeq yawj, raeb mbaw-raeu miz di heu, caeuq mbiengj-naj ndingyanyan doxbeij, gij nding couh engq nding lo. Bien moix “lwgfwnz” lumj faggawq nei, hawj mbawraeu bienq ndaej engqgya gyaundeidei sawj vunz gyaenz……

Mbaw ndeu rox seizcou, hoeng gou roxnyinh, mbaw ndeu engq rox langman. Neix hix sawj gou engqgya maqmuengh ndaej ngonzyawj mbawraeu engq gyaundeidei binaj……

(haj nienzgaep Gu Couhyenz)



Roegdingheng

Seizcin daengz lo, gyoengq duzroeg cungj angqvauvau guhfwen.

Roegdingheng vihmaz siliengz baenzneix, daej mbouj daengx mbouj duenh ne? Miz haujlai haemh gou loqfangzhwnz ndiu daeuj, lij ndaejnyi sing daej roegdingheng.

Ngoenzneix daxboh lwnh aengoj roegdingheng hawj gou dingq. Gou rox lo, roegdingheng ngeix ranzmbanj raixcaix, hoeng dauq ranz mbouj ndaej, aenvih miz vunz mbouj hawj de ma ranz.

Roegdingheng ha, mwngz gaej simnaiq lai. Daeuj ranz dou vei, daeuj caeuq dou caemh youq vei. Gou heuh daxboh guh aen roengq ndeu hawj mwngz, mwngz gyaenz lwi? Langhnaeuz mwngz mbouj gyaenz, gou couh youq gwnz faex baihnaj ranz guh aen rongz ndeu hawj mwngz, baenz lwi? Gizneix yienznaeuz mbouj dwg ranzmbanj gou, hoeng gou caeuq bohmeuh youq gizneix cungj gvaq ndaej vuenyungz dangqmaz. Daeuj vei, daeuj ranz gou vei, daeuj ranz gou mwngz couh angqfaengz lai lwgo.

Roegdingheng ha, mwngz gaej daej lo. Gou lwnh mwngz dingq bw, mwh gou ngamq daj Namzningz daeuj daengz ndaw lueg neix, gou goj daejnga' nga yaek dauqbae ranz. Daxboh naeuz, gizneix couhwdw ranz raeuz lwgo. Gou lij daej dem, naeuz gizneix mbouj ndei. Daxboh naeuz, youq ndaw guekcoj raeuz youq, mboujguenj dwg youq gizlawz, cungj vuenyungz. Youq gizlawz cungj ndei, mboujguenj youq gizlawz, ndawsim gyaenz couh raen ndei. Coenzvah daxboh naeuz ndaej deng bw, seizneix, gou gyaenz gizneix dahraix, gou raen gizneix ndei raixcaix. Ndoengfaex gwnz bya heuswdsd, gadah laj bya sawdikdik, gizgiz cungj miz va gyaundeidei hailangh.

Roegdingheng ha, gaej simnaiq lai. Miz vunz mbouj hawj mwngz bae ranz, hoeng, bouxlwz gimq ndaej mwngz ndawsim gyaenz bya gizneix, raemx gizneix, va gizneix, faex gizneix ne?

Roegdingheng ha, gaej simnaiq lai. Daeuj caeuq dou caemh youq vei, daeuj caeuq dou caemh gyaenz gizneix vei! Yienghneix, mwngz goj rox angqvauvau guhfwen lo.

(Daj《Bonjsei Sim Lwngyez》(Veiz Gizlinz raiz) senj okdaeuj, Lwgfwnzmeih/卢奋长 hoiz)

Guh Swhgeij Caen Ndei

Gyanghaemh ndaw ndoengfaex, gij rongh ronghndwen myoxmyad. Duzgvi iq boemz youq henz daemz, gag siengj: “Ai, danghnaeuz gou miz aenrwz lumj duzdouq nei lingzsingj, gaiqga lumj maxloeg nei raezrangh, aenndang lumj duzlingz nei riengret couh ndei lo……”

Cingqngamj, laj rongh rongh-ndwen byaij daeuj duz maxloeg ndeu. Duzgvi iq ganjvaiq ngiengx gyauej hwnj cam: “Dahcej maxloeg, vihmaz ga gou youh co youh dinj, gyap gwnz laeng youh naek youh geng ne?” Dahcej maxloeg lumj yawj rox gij siengjgap duzgvi iq nei, couh doiq de naeuz: “Byaij, gou daiq mwngz bae youzbyaij.” Duzgvi iq angqvauvau benz hwnj gwnz laeng dahcej maxloeg bae.

Songde byaij ha byaij ha, daeuj daengz ndaw ndoengfaex raemhrwd. Dahcej maxloeg gig miz eiqsei dwk cam: “Mwngz rox gij faex neix maj miz geijlai bi luma?” Duzgvi iq yawj ganj-faex hunghwd han: “Wnggai miz bak lai bi luba.” Dahcej maxloeg ngaekngaek gyauej, lwnh duzgvi iq naeuz: “Deng. Hoeng sou duzgvi dwg doenghduzraih souhmingh ceiq raez, lix ndaej mbouj beij gij faex neix dinj.” Duzgvi

iq gag siengj: Laxlawz gou baenzneix ak!

Songde byaij ha byaij ha, byaij daengz henz diuz dah raemx lae gig haenq he. Dahcej maxloeg doiq duzgvi iq naeuz: “Yienznaeuz dou youq gwnz dieg buet ndaej ak, hoeng youq ndaw raemx dou couh beij mbouj ndaej sou duzgvi, ndaem roengz daej raemx bae mbouj ndaej.” Duzgvi iq sim siengj: Laxlawz gou mbouj dwg boux mbouj miz saek yiengh ndei ndeu ha!

Songde byaij ha byaij ha, byaij daengz benq diegnywj heuyauyau he. Sawqmwh cienz daeuj sing cici caca, duzgvi iq deng hwk dwk dawz gyauej, din, rieng cungj suk haeuj ndaw gyap bae. Dahcej maxloeg raen le, riuhwhw naeuz: “Aengyap mwngz youh hung youh naek haenx yawj lumj dwg rap-naek, gizsaed dwg aenfa genggwat baujhoh mwngz. De ndaej bang mwngz swnhleih ndoj gvaq haujlai yungyiemj. Mboujgvaq haxbaenh cij dwg duzdouq he ginggvaq gizneix hane.” Gangj sat, songde doxcaeaz riuhaha.

Duzgvi iq nyaenx mbouj ndaej danqheiq naeuz: “Guh swhgeij caen ndei!”

(ngeih neinzgaep Cwnz Yijcingh)

